

# BOSNOM BEHAR PROBEHARAO

LITERARNI I LIKOVNI RADOVI  
POLAZNIKA PREDŠKOLSKIH  
USTANOVA I UČENIKA  
OSNOVNIH ŠKOLA 2020.



GALERIJA PREPOROD

U srcu Balkana ima jedna zemlja, mome srcu mila, a to je Bosna i Hercegovina. Prostrana je ona s ljepotama skrivenim, draguljima netaknutim. Prekrivena je zelenim travama kao zelenim serdžadama. Zemlja Bosna je mirisna, s mnoštvom boja istkana kao šareni ćilim što su ga tkale spretne ruke stare nane. Zbog toga *izuj obuću* kad hoćeš kročiti u Bosnu, jer *Bosna je ćilimom zastrta*. Svojom ljepotom i originalnošću uvijek su se isticali vjerski objekti koji su oduvijek u meni budili strahopoštovanje i divljenje.

Često odem da obiđem tunel u Butmiru, Tunel spasa, simbol otpora koji svjedoči o historiji mog zavičaja, mog grada i shvatim koliko snage i prkosa ima u mom zavičaju, pa kako da ga ne volim? Kako da ne volim ljepote Vrela Bosne, ispod snažnog Igmana? Velika aleja, duga stoljetna aleja kestenova, prirodni park ispresijecan izvorima i potocima, odmor za dušu i oči. Kada bih znala da imam još jedan dan, otišla bih na Stojčevac. Predivni grmovi divljih ruža, malina i kupina čine da poželiš da ostaneš tu, da ne mrdaš. Zatim se sjetiš da se u blizini ovog prirodnog raja nalazi i nekropola Vrutci s arheološkim nalazištima nekadašnje crkve sv. Stjepana Prvomučenika, kao i Rimski most pa poželiš da obiđeš sva mjesta tako brzo.

Zašto je moj zavičaj najljepši na svijetu? Možda zbog prahistorijskog naselja u Butmiru, možda zbog Vijećnice, Inat kuće, Begove džamije, Latinske ćuprije, Marijinog Dvora, Svrzine kuće, Zemaljskog i Historijskog muzeja, Narodnog pozorišta ili samog Sebilja koji je u srcu Čaršije. Ne znam, ali sam u jedno sigurna – da svaki dan pišem o svom zavičaju, mogla bih puno toga napisati. Bolan, prijatelju, zapitaj se malo... Zar igdje u bijelom svijetu ima ovoliko rahatluka kao u našoj domovini? Moj zavičaj pruža ljepotu i šarm svojim bezbrojnim ulicama i građevinama, ali pruža i toplinu i tradicionalnu gostoprimljivost.

Tramvajem prolazimo kroz različite periode s velikim kulturnim simbolima našeg grada i našeg zavičaja. Samim tim i tramvaj je simbol Sarajeva. U Sarajevu imamo mnogo mostova uz koje se prostiru i mnogobrojna šetališta koja su prilagođena svim uzrastima i koja donose mir, opuštanje, pravi



odmor i rekreaciju. O ljepoti rijeke Miljacke možemo mnogo pričati, jer je ona jako bitna za naš grad, on je po njoj i prozvan *Grad na Miljacki*. Grad koji vječno traje i koji opstaje usprkos svemu i svima, koji se iznova bori za svoje ljepote i simbole.

Čaršija je srce grada Sarajeva. Glavni trg s mnogo dućana svake vrste, ljudi koji svojim osmijesima mame i radnje koje privlače svojim izborom. Miris somuna i ćevapa, taj poznati sarajevski miris je neizbježan detalj o kojem pričaju svi koji posjete Sarajevo, jer Sarajevo je poznato po najboljim ćevapima. Medresa, Biblioteka, Hamam i Bezistan su građevine koje krase čaršiju, a podigao ih je čuveni Gazi Husrev-beg, bosanski beg u Osmanskom carstvu, ali i veliki graditelj Sarajeva. Bosna i Hercegovina je država ljubaznih, dobrih i uslužnih ljudi koje bolna historija nije pokolebala i poput feniksa su se digli iz pepela i dokazali, a i dalje, svakim danom sve jače i jače, dokazuju da nas ratne slike i bolna historija nisu uništile, već samo ojačale. Nisam živjela tada, ali me boli. Boli me što se stavlja kamen šutnje na događaje u ovoj zemlji. Ova prkosna Bosna i Hercegovina preživjela je opsadu, preživjela je patnju svog naroda. Imala je toliko snage, ali danas... Danas se uz spomen njenog imena veže samo taj rat. Ne smijemo zaboraviti naše branitelje i heroje, jer sve ono što je danas i sve ono što smo mi, to smo zahvaljujući njima. Sada hodamo uzdignute glave i s ponosom.

☺ Kroz našu državu su prošli mnogi, ali niko nije mogao ostaviti toliko snažan pečat kao naši branitelji, heroji, naš ponos i dika. Kroz mene teče bosansko srebro i zlato. Kažu da je najteže objasniti ljubav, jer ljubav se ne objašnjava, ljubav se živi pa je tako i teško objasniti zašto volim ovu zemlju. Ne damo te, Bosno moja! Dok je tvoje djece i omladine, ti se ne plaši, mi smo tu za tebe. Živjeti ovdje je čast, jer ti nam pružaš sigurnost, daješ dom i činiš nas slobodnim. Lijepa si tokom ljeta, a još ljepša ujesen. Zimske pahuljice, kad prekriju gradove, Bosnu učine očaravajućom više nego što ona to jeste; u proljeće, Bosnom behar prođe i ona je tada poput najmirisnijeg cvijeća. Zato, prijatelju, ako ikada odlučiš da napustiš ovu zemlju, znaj da je posebna kao i ljudi u njoj. Vjeruj mi na riječ, poželjlet ćeš da se vratiš i bar još jednom osjetiš da si kod kuće.

HANA BANDA, IX<sup>2</sup> razred  
Treća osnovna škola, Ilidža